

Prome cu insinua, reprocha y acusa, laga polis haci su trabao

Diasabra atrobe a tuma lugar un desgracia fatal di trafico, den cual desgracia e manehador di e motocicleta Wimbert "Wimbo" Apostel a perde su bida.

Aki atrobe nos ta ser confronta cu un desgracia caminda tur sorto di ponencia ta bin dilanti, acusacionnan ta ser haci, y insinuacionnan ta wordo expresa cu finalmente no ta resulta manera a ser "papia" y cu hasta por trece malcontento y problema pornada.

Diripiente un remitido a bin aden ayera cu cierto ponencianan den dje prome cu investigacion ta cera riba e caso aki y aki atrobe mester bisa pa no insinua sin cu tin seguridad.

E desgracia a tuma lugar.

Chofer di e auto mes ora a wordo "culpa" pa motibo di no a duna preferencia.

Esnan cu a culpa e chofer, a mira e desgracia tuma lugar, y cu e no a duna preferencia pa culpe di e desgracia?

Tin testigo cu a mira esaki?

Te asina leeuw cu mi sa ningun hende a bin dilanti como testigo pa bisa kico nan a mira.

Segun mi tin entendi, e chofer lo a laga sa cu ora el a bira, e no a mira e motocicleta.

Si e no a mira e motocicleta, mester tabata tin un motibo cu ta asina.

Por ta anto cu e motocicleta a bin cu velocidad halto di pabao y sin luz?

Nos no sa esey si ningun hende a testigua di a ripara of mira esaki

Tin un persona cu lo a laga sa cu e motocicleta a pasa den luz corra na Piet y cu velocidad halto.

Si ta asina, pakico no bin dilanti y pone polisnan na altura pa nan

investigacion.

Aki bo ta yuda saca e chofer di auto for di un situacion doloroso cu e ta aden.

Di otro banda, bo ta pone tambe cu familianan di e difunto ta sinti nan mes cu mas dolor bao di e impresion cu ta nan difunto tabata core irresponsable si e ponencia ey no ta corecto.

E investigacion no ta cera.

No por bay culpa e chofer - cu segun mi tin entendi, no tabata tin pura, no sa bebe ni huma, y cu lo no a mira e motocicleta.

Pero no por culpa e difunto tampoco, insinuando cu e lo a pasa den luz corra y cu velocidad halto.

E cosnan aki ta pa autoridadnan investiga y determina culpabilidad.

Si tin testigo cu a mira e desgracia sosode, ta mihor nan bin dilanti y duna nan version di kico nan a mira y no laga un chofer inocente haya culpa di algo cu aparentemente e lo no tin culpa di dje, y no laga un difunto wordo mancha negativamente pa algo cu e no a comete na bida.

Mientras cu e desgracia aki no a wordo aclarea, ta dos Familia tin ta sufriendo, eseynan ta familia di e difunto, pero tambe familia di e chofer di auto, y den e caso aki, rumornan, insinuacionnan, acusacionnan, reprochenan, mester keda un banda lagando departamento di trafico cumpli cu su trabao.

Si puntrami kende ta kende den e desgracia aki, mi por bisa cu mi no sa kende chofer di e auto ta, y di e difunto lo unico cu mi sa ta cu e ta un dragacer popular riba nos isla, pues aki no ta asunto di tuma parti pa ningun di dos.

Juby